

## Cadorins

Nte sto sfoi vien scrite toche par Comelean, par ladin de l'Oltreciusa e par ladin del Cadore de Medo. Chi che scrive é libero de dorà l modo che retien pì giusto senza bete regole

## Al Grupo musical d Costauta iné rivó al ciodòn di 25 ane

*Piön de dente zal salon dla Regola dal pöis comeliön par föi festa e spié al spettacul d Nadà*

Al grupo musical d Costauta ié rivó al ciodòn di vintizinc ane de ativité zal cianpo dla cultura e dla lönga ladina. Tacada cuasi par scherzo, sta ventura iné lieda a la publicazion dal libro "I Nuizes" de Giovanni De Bettin Linc, na òra dal 1983, cuön che sto pitor e scrittor da Costauta inà voltó par comeliön, in forma de scrittura teatral, al romanzo "I promessi sposi" de Alessandro Manzoni. In-clota, pla presentazion al 6 d agosto zla sala dla Regola d Costauta, su l invito era scritto: "un grupo musical da Costauta ciantarà nasché canzogn e balade par ladin". Infate in cla ocasion Daniele De Bettin avee btu in musica nascuante poesii de autores dal pöis, e na desina d amighe s era inzarzade a ciantà ste canzogn per rende pì legra l ocasion dla presentazion dal libro. Ma intrà la beleza dla lönga viva, reciteda zi descorse intrà i personage di Nuizes, e la novité dle canzogn par ladin, la dente inà domandó da continué a portà sul palco sta formula d canzogn e recitazion e csi, zal Nadà dal 1983, al Grupo musical d Costauta inà btu a di la so esperienza de spettacui par ladin dal Comelgo, col nome ch iné restó tal e cual, per ricordà al pöis gno ch é nassuda sta esperienza e mantgnì la liadura apede sta tera gno ch duce i amighe ch cianta e recita inà conservó el so radis.

Zun 25 ane d ativité al grupo musical d Costauta inà fato tante de cle robe ch n serve stà cialò a ricordà,

parcheche s é parló spösso di spettacui, dle canzogn, di libre, di dische, dal laoro par tgni viva la parlata ladina e la cultura in colaborazion apede scole, grupes, université, istitutes culturai.

Ma par ricordà i prime ane de sta esperienza ncamò piöna d entusiasmo, al grupo inà volù tornà a stanpà el prime dói incisiogn di ane Otanta, val a di el casöte "Al valzer dal Comelgo" e "Söra d Nadà" ormai sparide da la circolazion da ane, par tornà a föi scotà cle canzogn zun cd musical. E csi par Nadà, co la presentazion fata zla sala dla Regola dante tresento parsones, iné stó do fora al cd "Che bel ch iné l Comelgo", con dinze 8 canzogn dal "Valzer dal Comelgo", 6 de "Söra d Nadà" e 2 mai registrede. 16 ciantade da scotà lontera, ch fa tornà da möinte el prime e, par tance el pi bele, canzogn dal Grupo. Par l ocasion iné torna-de sul palco anche dói amighe di prime ane, ch à lassó un ricordo zun tance ch se-gue i spettacui dal grupo, Patrizia Eicher Clere, ch à ciantó dói canzogn, e Carmen De Bettin, ch inà interpretó al personagio d Perpetua di Nuizes. Na söra de grön emozion söia par cöi dal Grupo che par duta la dente ch era ilò dla Regola la söra dopo d Nadà.

Sta sodisfazion iné stada rovinada da la decision, flostà insieme dal Comun d San Piöro e da la Curia de Blun, da scorsnà al Grupo musical d Costauta da la so sede de prove, zal piön tera dla calonga d Costauta.

Contra sta decision flostà senza parlà e senza visé, e picsöia senza nsuna motivazion, inà ciapó posizion tanta dente da ogni banda dla provinzia de Blun e anche fora. Sto ato autoritario dimostra ncamò n ota che la gnoranza inà paura dla cultura e che basta un cualsiasi tizio co na fassa o co na veste rossa par farmà al laoro d ane dla dente volontadiva.

Nanche de fronte a sto ato al Grupo musical d Costauta ne n à ciapó paura e continuerà la so ativité co l stösso entusiasmo par i prosme ane.

*Lucio Eicher Clere*